

Suno Aur Amal Karo

Injeel : Mattā 7:15-29

[Īsā^(a.s) logoñ ko taaleem de rahe the, wo wahaan maujud logoñ se bole,] “Jhuṭhe nabiyon se khabardaar raho. Wo tumhaare paas bheḍ kī khaal oḍh kar āeñge, lekin aṅdar se wo kḥuñkḥaar bheḍiyon kī tarah hī hoñge. ⁽¹⁵⁾ Tum in logoñ ko inkī harkaton se pahachaan loge. Kyā tum aṅgur ko kaañṭedaar ghaaṅs-phuṅs se toḍte ho? Aur kyā tum aṅjeer ko kaañṭedaar jhaaḍiyon se toḍte ho? Naheen! ⁽¹⁶⁾ Isī tarah se, acḥe peḍ acḥe phal paidā karteñ haiñ aur kḥaraab peḍon me kḥaraab phal hī ugte haiñ. ⁽¹⁷⁾ Ek acḥā peḍ kabhī bhī kḥaraab phal naheen paidā kartā aur nā kabhī kisī kḥaraab peḍ me acḥā phal ugtā hai. ⁽¹⁸⁾ Kḥaraab peḍon ko kaaṭ kar āg me pheñk diyā jaaegā. ⁽¹⁹⁾ To isī tarah se, tum jhuṭhe nabiyon kī harkaton ko dekh kar unheñ pahachaan jaaoge. ⁽²⁰⁾

“Har inṣaan jo mujhe apnā maulā kahtā hai wo jannat me daakḥil naheen ho paaegā. Naheen, sirf wahī log jannat me jaaeñge jo Allaah rabbul ālameen ko pasaṅd āne waale kaam karte haiñ. ⁽²¹⁾ Jab ākḥirī din āegā, to bahut saare log mujh se kaheñge, ‘Yā maulā, hamne āpke naam se peshanagoeeyaan karī, gaṅdī ruhoñ ko bhagaayā, aur āpke hī naam se bahut saare karishme kare haiñ. ⁽²²⁾ Lekin maiñ unse saaf kah duñgā, ‘E gunaahgaaron, mere paas se dur bhaag jao, maiñ tumheñ naheen pahachaantā. ⁽²³⁾

“Islie, merī baaton ko sunne aur us par amal karne waalā inṣaan bahut aklamaṅd hai. Ek aklamaṅd inṣaan apnā ghar pattharon par banaatā hai. ⁽²⁴⁾ Tez baarish aur tez hawā uske ghar ko uḍā le jaane kī koshish kartī hai, lekin uskā ghar barbaad naheen hotā kyuñki uske ghar kī neenw pattharon par rakhī huī hai. ⁽²⁵⁾ Lekin jo bhī mere kalaam ko suntā hai us par amal naheen kartā, to wo us bewaquf inṣaan kī tarah hai ki jo apnā ghar ret par banaatā hai. ⁽²⁶⁾ Baarish se āī baaḍh aur tez hawaaen uske ghar ko uḍā le jaatī haiñ aur wo purī tarah se barbaad ho jaatā hai. ⁽²⁷⁾

Īsā^(a.s) kī ye baateñ sun kar bheḍ me maujud sabhī log hairaan rah gae. ⁽²⁸⁾ Īsā^(a.s) logoñ ko shareeyat paḍhaane waale ustaadon kī tarah taaleem naheen dete the. Wo unko pure iḳhtiyaar ke saath taaleem dete the. ⁽²⁹⁾